

20/10/2003

Kemampuan Malaysia diiktiraf

Wan Emril Nizam Bin Wan Embong

SIDANG Puncak Pertubuhan Persidangan Islam (OIC) di Putrajaya melakarkan sejarah baru apabila mengeluarkan deklarası yang mengandungi 12 perkara khusus untuk kepentingan umat Islam di seluruh dunia.

Pada persidangan kali ini juga membuktikan dunia Islam mengiktiraf dan mengakui kepemimpinan Perdana Menteri Datuk Seri Dr Mahathir Mohammad dalam membela dan memperjuangkan nasib umat Islam.

Bagi kami peserta Program Kapal Belia Asia yang kini berada di Tokyo, Jepun sempena Sambutan 30 Tahun program ini, berbangga dengan kejayaan negara menganjurkan persidangan yang begitu bermakna dan bererti buat umat Islam di seluruh dunia.

Ketika kami menghadiri sambutan 30 tahun program ini, diadakan pembentangan kertas kerja bertajuk Future Partnership Between Asean and Japan oleh profesor dari Centre of Asean Studies di Jepun.

Beliau kelihatan begitu optimis dengan kemampuan Asia untuk menjadi kuasa ekonomi dunia pada masa akan datang dan melihat kerjasama di antara negara Asean dengan Jepun membawa impak dan kesan yang berfaedah untuk Asia termasuk kewujudan Asean+3 yang meliputi China dan Korea.

Saya menimbulkan soalan mengenai sama ada Asia mampu menjadi kuasa baru dunia pada masa akan datang, lantas beliau dengan yakin menegaskan kemampuan itu memang wujud pada negara Asia berdasarkan cabaran dan pengalaman yang dihadapi pada masa kini.

Ditambah pula dengan keazaman dan kemampuan Asia yang diketuai Jepun, China dan Korea untuk membentuk satu pakatan strategik seperti EU dan memiliki mata wang tersendiri.

Beliau berkata, cadangan untuk mewujudkan mata wang Asia dan membentuk satu komuniti masih menjadi polemik perbincangan dan ini bergantung kepada masa depan hubungan yang sedia ada di kalangan negara Asia.

Beliau juga kagum dengan cara Perdana Menteri Malaysia menangani krisis mata wang dan mentadbir urus ekonomi negara. Beliau melihat setiap cadangan dan idea bernas yang dikemukakan oleh Dr Mahathir mampu membawa satu dimensi baru untuk seluruh Asia.

Apa yang ingin dinyatakan di sini ialah dunia mengiktiraf kemampuan Dr Mahathir mengurus dan mentadbir negara kita dan menyuarakan pandangan dan idea secara telus dan berasas.

Walaupun di dalam dua persidangan yang berbeza hakikatnya, Malaysia kini menjadi contoh bukan saja di kalangan negara Islam bahkan negara lain yang mengkaji dan menganalisis sumbangan pemikiran dan pandangan bernas pemimpin negara.

WAN EMRIL NIZAM BIN WAN EMBONG
Hotel New Otani Tokyo, Jepun.